

14. oktober 2020

UPA2020/11

Erik Jensen

2019-imut Nunatta Karsiata naatsorsuutaasa akuersissutigineqarnissaannik siunnersuut
(Aningaasaqarnermut Akileraartarnermullu Naalakkersuisoq)

Siullermik ilisimatitsissutigissavarput nunatta karsiata naatsorsuutai upernaakkut siullerneqartarnerat ingerlasaraluarimat, aatsaallu ukiakkut inaarutaasumik suliarineqartaraluarlutik. Ilisimaneqartutuulli nunarsuarmi corona peqqutigalugu maanna pissutsit naliginnaasut allaanerupput, taamaattumillu maanna ukiakkut nunatta karsiata naatsorsuutai aatsaat siullermeerneqartussanngorluni.

Siumumiit aammalu Nunatta Qitornai sinnerlugit Nunatta Karsiata 2019-imut naatsorsuutaai akuerineqarnissaat pillugu inatsisartunut aalajangiiffigisassatut siunnersuutip siullermeerneqarnerani imaattunik naatsumik oqaaseqaateqassaagut.

Suleqatigiinniit maluginiakkatta pingaarnert ilagaat, nunatta karsiata naatsorsuutai 2019-imoortut ukiut siulii assigalugit naatsorsuutit naalagaaffiup akuerisaanik kukkunersiuisuniit nangaanartortaqartinneqaratik oqaaseqaatigineqarfigineqarsimanerat.

Nunatta karsiata naatsorsuutai pillugit kukkunersiuiernermit ataatsimiisitaliaq aasap ingerlanerani maani Nuummi isumasioqatigiissimavoq (tassa seminar-isimavoq) naatsorsuutit pillugit apeqqutit assigiinngitsorpassuit Naalakkersuisuniit itisilertinnissaat siunertaralugu. Taannalu suliaq piareeriarpat maani inersuarmi aamma saqqummiussisoqarlunilu samminninnissatsinnut itisiliinerunissatsinnullu qilanaarpugut.

Nunatta karsia 2019-imi Ingerlatsinermi, Sanaartornermi, Taarsigassarsititsinerlu (DAU: Drift Anlæg Udlån-imik taaneqartartoq) aallaavigalugu 137 mio.-inik sinneqartoorfiuvoq. Tassa missingersuusiornermi 43 mio.-inik amigartooruteqarfiusussatut missingersuusiorfigineqarsimagaluartoq maanna sinneqartoorfiulluni. Tamannalu ilaatigut eqqussuiniarnermi akitsuutitigut, sulisoqarnermut akitsuutitigut, qamutit motorillit akitsuutaanniit aammalu qaleralinnut akitsuutitigut naatsorsuutigisamiit annertunerusumik isertitaqarnerusimanermik aallaaveqartoq maluginiakkatta ilagivaat.

Naatsorsuutit pillugit misissorluarnerani nuannaarutigaarput Sanaartornermut Iluarsagassanullu Aningaasaateqarfimmi (anlægs & renoveringsfonden-imi) aningaasaat uninngatinneqartut 2019-ip naanerani 1.2 mia-inngorsimasut 2019-ip ingerlanerani 55 mio.-inik apparialaarsimanerat. Isumaqarpugulli aningaasat taamat amerlatigisut suli annerujussuarmik inuiaqatigiinni sulisinneqarnissaat ingerlanneqartariaqartoq. Tamatumunngalu ilutigitillugu aamma paasinnilluarpugut ukiuni makkunani assaat sulisinnaasut annertoorujussuarmik amigaatigineqarnerat pequtaalluni suliassap taassumap unamminartortaqarsinnaanera.

Taamatut oqaaseqarluta nunatta karsiata naatsorsuutai, naatsorsuutillu sinneri malitsigisai ilanngullugit kukkuniuinnermut ataatsimiisitaliamit aappassaaneerqannginnermini suliarineqarnissaat innersuussutigaagut.

Erik Jensen - Siumut